



Inuit Ataqatigiit Inatsisartuni

16. oktober 2009

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpunga:

Apeqqutit:

1. Nanortallip aalisakkanik tunitsiveqarnerata aaqqiivigineqarnissaanut Naalakkersuisut qanoq pilersaaruteqarniarpat ?
2. Naalakkersuisut tunitsiviup ammannartinneqarnissaanut pilersaaruteqarnerlutik ?
3. Tunumi aalisarfiusut biologinik matugallarneqarsimasut qanoq sivistigisumik matoqqattinneqassanersut Naalakkersuisut sunik paasissutissiisinnaappat ?

(Inatsisartuni ilaasortaq Debora Kleist, Inuit Ataqatigiit)

Tungavilersuut:

Qujanartumik inuit arlallit suleqatigiinnerisigut Nanortallip tunisassiorfia ukiuni kingullerni ingerlalluarpoq. Saarullit avammut tunisartagai pitsaasutut nalilersorneqartartut tunisassiorfiup pisortaata paasissutissiisutigaa. Ulloq manna tikillugu taamatut tunisassiorneq ingerlavoq.

Maannalu kingumut tunisassiorfiup matuneqarnissaa ilimasaarutigineqarpoq tamannalu pissappat illoqarfimmut suliffissaaleqiffiusumut annertuumik kingunerluttussaassaaq.

Tunisassiorfiup pisortaata paasissutissiinera naapertorlugu, tunisassiorfiup matuneqarneratigut inuit 30-40 miss. suliffissaarutisapput.

Tunisassiorfiup matuneqarneratigut ajuusaarnarluinnartumik ulluinnarni ilaqtariippassuit inuuniarnerannut aningaasaqarniarnerannullu ajornartorsiuteqalernermik kinguneqassaaq. Taassumalu saniatigut Kommunep aningaasaqarniarneranut sunniuteqassaaq, inuimmi suliffissaarussimasut arlaatigut ikiorsorneqarnissamik pisariaqartitsissammata.

Tunisassiorfiup ammannartinneqarneratigut ilaqtariippassuit inuuniarnerminni ajornartorsiulersinnaanerigaluat pinaveersimatinniarneqarsinnaavoq aammalu avammut tunisassiat pitsaasut ataavartumik ingerlaannarnissaat qulakkeerneqassaluarluni.